
“САХОВАТ ВА КЎМАК” УМУМХАЛҚ ҲАРАКАТИ ЧЎНҒАРАГА ЕТИБ КЕЛДИ

Рамазон дуолар ижобат бўладиган ой. Ўзбекистон Республикаси Президенти Шавкат Мирзиёев ташаббуси билан шу қутлуғ ой арафасида савобли ва олийжаноб иш бошланди. Юртимиз бўйлаб “Саховат ва кўмак” умумхалқ ҳаракати йўл олди. Тадбиркору фермерлар, йирик-йирик корхоналар биринчи кундан атроф маҳалла, қишлоқ, кўп қаватли уйлардаги кам таъминланган оила, ишсиз аёллар ва ёшларни аниқлаб, ўз жамоаларига қабул қиляптилар. Уларни иш билан таъминлаб, амалий кўмак беришмоқда.

Бугун “Саховат ва кўмак” умумхалқ ҳаракати Риштон туманининг Қирғизистон Республикаси Боткен вилояти ҳудудидаги анклав Чўнғара қишлоғига етиб борди.

Фарғона вилояти ҳокими Шухрат Ғаниев ун ва ёғ ортилган автомашиналар билан чўнғараликларни хабар олгани келди.

Шухрат Ғаниевни чегара ҳудудида Боткен вилояти губернатори Алишер Абдурахмонов кутиб олди. Улар икки давлат Президентларининг олий даражадаги мулоқотларида белгилаб берилган ўзаро қўни-қўшничилик, иқтисодий ва маънавий соҳалардаги ҳамкорлик янада мустаҳкамланаверади, дедилар.

- Коронавирус пандемияси бошланган чоғда Ўзбекистоннинг Қирғизистонга, Фарғона вилоятининг Боткен вилоятига дезинфекция ва яккаланиш – санитария воситаларидан беғараз кўрсатган ёрдами учун халқимиз чуқур миннатдорчилик изҳор қилмоқда, - деди Боткен вилояти губернатори Алишер Абдурахмонов. – Дўст бошига иш тушганда билинади. Ўзбек-қирғиз халқи азалдан мустаҳкам дўстдир.

Шундан сўнг ун ва ёғ ортилган машиналар Чўнғара кўчалари бўйлаб йўл олди.

- Президентимиз кўрсатаётган эътибор ва ғамхўрлик туфайли биз ўзимизни ҳеч қачон анклав ҳолатдаги қишлоқ деб билмаймиз, - деди маҳалла фуқаролар йиғини раиси Муроджон Сотволдиев. – Мана бугун шак кунида қишлоғимиздаги 300 дан зиёд хонадоннинг ҳар бирига бир копдан ун ва ёғ ҳайрия қилиб тарқатилляпти.

Шу куни вилоят ҳокими Шухрат Ғаниев Чўнғара қишлоғи аҳолиси вакиллари билан учрашиб, коронавирус пандемияси шароитидаги вазиятни муҳокама қилди. Чўнғараликларга бундан буён ҳам ҳар томонлама кўмак бериб борилаверади, деди ҳоким.

Қишлоқ аҳолиси вакиллари дуога қўл очиб юртимизга тинчлик, омонлик, давлатимизга равнақ тиладилар, дунё халқлари бошига келган бало тезроқ кўтарилишини, давлатимиз раҳбари Шавкат Мирзиёевга яратган узоқ умр, янада улуғ мартаба берсин дея дуо қилдилар.

Фарғона вилояти ҳокимлиги Ахборот хизмати Facebook, Telegram, Веб сайт, YouTube

2020-04-23 18:48:33